

İak'ovi namak' **Bëšin əyit**

Me namak'a şampi İak'ov İsusi Çark'est'al baksuna q'abulbit'oğoy cəmiyətə gele hörmətlu, şila sa amdarey. Şo İsusaxun sagala kalabaki, ama Çark'est'al baksuna Şot'ay dirist' vədine təə, p'uri bëyinbakit'uxun oşa q'abulbit'oğoxuney. Alimxoy fikirə görə İak'ovi me namak' İsus bëyinbakit'uxun oşa şameşi girkurxoy boş ən süft'ə şameşit'oğoxun soğone. Maya şamesuna dəgig nuval avabakayan, namak'i tarix hari 45-50-ci usenxone c'eysa.

İak'ovi iudeyxoynak' şampi me namak' pes banekon ögüd-nəsyət tadala sa namak'e. Miya çark'esuna q'azayınşbsun çureğalt'oğə tadeşi nəsyətxoy boş müdrək baki axıral şirik' portpsun, tamaxa nu bafst'un, Müq Xavara ibaki şot'o əməlbsun, çureğalt'oğə Buxaçuğoxun afırıpı çuresun, varlu-kəsib nu c'ək'psun, muza girbsun, hər şeyi Buxaçuğoy kiye baksuna q'amışaksun saal me dünyəne dəyərlu bakalt'oğə təə, ama Buxaçuğə bitot'uxun üst'ün laxsune bu.

İak'ovi döörəst'a İsusi Çark'est'al baksuna q'abulbit'oğoy gelo hələ ki saycə iudeyxoney, mo İak'oven izi müdrək nəsyətxə tatad'an lap Solomon k'inək' əyitpsunaxunal ak'esa.

Girke boş bakalorox:

1:1 Namak'i iudeyxoynak' baksuna ak'est'ala
burqesun

1:2-12 İzi var-dövlətə güvəyiñsakalt'u təə,
müdrük baki axıral şirik' portp'alt'u tadeğale

1:13-18 Sinəyiñsalo təə, yəşəyiñş tadalone
Buxaçu

1:19-27 İbakit'oğə əməlbənan

2:1-13 Bitot'ay loxol sa piin bəğanə

2:14-26 Vi vəluğa vi biq'ala əşurxon ten
ak'est'asa, şot'ay sa xeyir tene bu

3:1-12 Əyitmoğon bes bakalt'oğoy barada

3:13-18 Həgigi müdrüklüğ

4:1-12 Vəx Buxaçuğoy bəş oq'a biq'anə

4:13-17 Hər şey Buxaçuğoy kiyele

5:1-6 Ef ğina önəpanə, ay dövlətluyorox

5:7-11 Axıral şirik' portp'alt'u tadeğale

5:12 Eləpsunəxun əxil bəkanə

5:13-18 Afırıpsunən bes bəkalorox

5:19-20 Axırinci nəsyət

¹ İsraili p'as's'e tayfinəxun bəkit'oğoynak',
İsus Xrist'osi Çark'est'al baksuna q'əbulbi, me
dünyəne şarəşi bito iudeyxoynak' xeyirq'an
baki. Buxaçuğoy q'a Q'onçux İsus Xrist'osi nöker
bəkala İak'ovene şəmə vəynak'. *

*İzi var-dövlətə güvəyiñsakalt'u təə, müdrük
baki axıral şirik' portp'alt'u tadeğale*

² Bez vıçimux, ef bəş vəx düz yaq'axun c'evk'es
bəkala hetər çətinlüğ c'eğale c'ereq'an, şot'o kala
sa müqlüğən q'əbulbənan.

* 1:1 1:1 Mat'. 13:55; Mrk'. 6:3; Ap'ost'. 1:1; 11:19; 15:13; Gal.
1:19

³ Efi hər çətinluğa baft'i vələğa nu açespsunen vəst'a oşin çətinluğa bakala portpsunane avuzbsa.

⁴ Çətinluğxo portpsunenal vəx ap'i, noxsansuz sa amdare bsa.

⁵ Əgər şunesa mot'aynak' müdrikluge lazımsa, barta t'e müdrikluge Buxaçuğoxunq'an çureşi, şot'oval tadeğale. Şot'o görə ki, taxsıra çoyel duğnut, me müdriklugaxun bol-bol bitova paybala Buxaçuxe Şo.

⁶ Ama çureğat'an vëbakiq'an çureşi barta, izi çureğalt'u haq'sunaxun maq'an şüpələyinşaki. Şot'o görə ki, şüpələyinşakalo muşen fupı taşala dənizi ləpə k'inək'e, taşi q'ayana laft'i şaresune şot'ay axır.

⁷ Metər amdaren Buxaçuğoxun k'ənesa haq'es baksuni fikirə iz eyexun c'evk'eq'an.

⁸ İzi mani yaq'en taysuna q'ərar nu tadiyone şo, burqi əslə bex nu p'ap'esp'alone.

⁹ Ay viçimux, barta ef boş bakala kəsibeynak' izi bitot'uxun oq'a baksun içeynak' sa var-dövlətq'an baki, şot'aynak' ki, şo Buxaçuğoy piyes bitot'uxun üst'üne.

¹⁰ Varlu bakalt'u isə Buxaçuğon şot'in içü oq'a biq'at'ane əqevk'on, şot'o görə ki, şot'ost'a bakala var-dövlət c'ovaki tağala sa şeye, q'oruğa əfçibaki tağala sa vard k'inək'e.

¹¹ Bəgen c'eri şerebit'uxun oşa çukeşi bitala t'e varde gözəlluğaxun sal irizal tene mandon. Varlu amdaral haketər: izi əşp'i girbala vədine əfçibaki taneğon şo.

Sinəyinşalo təə, yəşəyinş tadalone Buxaçux

12 Bəxt'əvərə çətinluğxo portp'i şot'oğoxun çomas'i c'eğalorox, şot'o görə ki, Buxaçuğon İçu çureğalt'oğə əyit tadi həmişəluğ yəşəyinşə pay k'inək' haq'alorox bakale şorox.

13 Efi biq'ala əşlin günax baksuna avabak-sun şot'ay bəş aciz mandat'an, umapanan "mo za Buxaçuğone sinəyinşbsa". Buxaçuğ nə İç tamaxa baft'ala Buxaçuğ tene, nəəl şunesa tamaxa bast'unen sinəyinşala Buxaçuğ tene.

14 Amdara günaxi bəş aciz efi sinəyinşalo izi tamaxxone. Günax bakala şeymoğə tamaxp'i çuresunene amdara düz nu bakala yaq'a zapi günax best'on.

15 Me tamaxen amdari boş tum sakat'an günaxe əmələ eysa. Əmələ hari günaxi eçala baral bisune baksa.

16 Ay zaynak' əziz bakala viçimux, bəğanən feret'mabakanan.

17 Buxaçuğon, göynul bakala muç'uliğə yarat-mişə Bavan, yax saat' şeymuxə tadon. Şot'ay yax tadala payurxo noxsansuz payurxone. Nu badal-bakalone Şo, xoji k'inək' nu c'ovaki tağalone.

18 Axırı Şot'in İçine me nu badalbakala, yəşəyinş tades bakala, əyitə beş boş tum sakest'i. Bar eçeriyal nübəryan baki yan Şot'aynak' İzi yarat'mişit'oğoy boş. †

† 1:18 1:18 - İsrailuğon içəğoy becərişi oçalaxun girbi süft'in nübərəxun Q'onçuğoynak' payt'un eşt'ay (+Ams'i oç. 15:17-21+). Mo Şot'aynak' İzi yaq'abi xeyir-bərəkəten eçeri nübərey. İakoven İsusa çark'est'al k'inək' q'abulbit'oğoxun süft'int'oğə "nübər" upsunen şot'oğoy Buxaçuğoy yəşəyinş tades bakala əyiten eçeri nübər baksunane ak'est'a.

İbakit'oğō əməlbənan

¹⁹ Ay bez əziz vıçimux, bəğənan vəx k'əz nex: gele əyitp'i usum bəc'ük'esunaxun əxil bakanan, bartanan vəynak' ümüxlaxsunq'an bəş baki.

²⁰ Əcuğon biq'i amdareynak' Buxaçuğoy piyes saat' ak'eğala əşur biq'sun mümkün tene.

²¹ Şot'o görəl, pisluga q'a posp'i vəx murdar-layinşes bakala əcuğō t'öǝxbənan, bartanan vəx çark'est'es bakala Əyiten ef boş tum sakesq'an baki. Mot'o müqluğen q'abulbənan!

²² Q'abulpsun isə saycə ümüxlaxsun təə, efi ibakit'oğō əməlbsun upsune, tene vən vəx əfçiduğinan baksa.

²³ Şot'o görə ki, Əyitə ibaki, ama Şot'o nu əməlbala amdar güzginə bəğat'an içü ak'ala amdar k'inək'e.

²⁴ Güzgin bəşt'an tağay tağala k'inək' iz çō iz eyexun c'eneğon şot'ay.

²⁵ Ama yax çark'est'es bakala Buxaçuğoy noxsansuz k'anuna ibaki şot'o əməlbala amdar bəxt'əvərə! Xeyir-bərəkət haq'ale şot'in iz biq'ala əşurxost'a!

²⁶ İçü Buxaçuğō və sa amdar hesabbi, ama izi jomoy q'aroola zapes nu bakalt'ay vėluğaxun sa xeyir tene bu, ams'i exlote hat'etər.

²⁷ Buxaçuğō həgigiyal və bakala amdaren yetimxo q'a süpür mandi çupuxxo kule box-odon, me dünyəne bakala pislugi xojinal izi loxol bist'a tene bark'on t'e amdaren. Metərt'ay vėluğə Buxaçuğoy, beşi göynul bakala Bavay piyes təmiz hamal noxsansuz ak'eğon.

2

Bitot'ay loxol sa piin bəğanan

¹ Ay bezi viçimux, ay İsus Xrist'osa, beşi bitot'uxun üst'ün bakala Q'onçuğö q'abulbiyoro, barta vöst'a amdarxo c'ək'psun maq'an baki, bitot'ay loxol sa piin bəğanan.

² T'etəre bakon ki, efi gireşi Buxaçuğö bul k'os'bala gala şaat' lapi, izi k'əşine q'ızılı boğöçal bakala varlu sa amdaraxun barabar kəsib, pis lapi sa amdaral enəğon.

³ T'e vədə şaat' lapit'ay loxol bəği "eki, c'ovaka best'a arsa" pi, kəsibə isə "çurpa kiya, ga bakayin bez turmoğost'a arenşon" ukalnansa,

⁴ ene düzgünluğaxun əxil bakala t'e divanbalx-oxun efi k'ə fərge baki? Metər bi vəynak' viçi bakalt'oğö c'ək'p'inan baksa vən!

⁵ Ay bez əziz viçimux, isə ibakanan k'əz nex! Buxaçuğon "Za çureğaloro, bağale Bezi padçağluğa" uk'at'an me dünyəne bakalt'oğoy piyes kəsib ak'eğalt'oğone nexey, şot'o görə ki, Buxaçuğö baç'an tarast'unast'ane şot'oğoy var-dövlət.

⁶ Ama həysə bezi pi hərəkəten vən kəsibə hik'k'al binan baksa. P'oy hame varluyox tene ki, vəx divanbest'i sa məhkəminəxun t'iyəmi məhkəminə xork'alo?

⁷ Şorox tene ki, İzi t'e bitot'uxun üst'ün s'i efi loxol bakala Xrist'osa bñhi tağala əyitmux uk'alo?

⁸ Bəğanan, əgər vən beşi padçağ bakala Buxaçuğoy laxi ən vacib k'anuna, İvel Şame boş bakala "vi İşat'u hun va çureğala k'inək' çureki"

əyitə həgigiyal əməlnanbsasa, t'e vədə düzgün
əş biq'ınan baksa. *

⁹ Bitot'ay loxol sa piin tenan bəğsasa,
günax əşp'est'inan baksa. K'anuna görəl mo
Buxaçuğoy laxi yaq'axun c'eyusun upsune.

¹⁰ Axırı laxeşi k'anunen tağalt'in k'anuni boş
şameşit'oğoy sunt'uxunal bakayin c'eğayin, mo
dirist' k'anuna nu əməlbsun upsune.

¹¹ "Əxlagsuzluğmaba" † pi Buxaçuğon "be-
smaba" ‡ əyitəl pene. Metərə c'eysa ki,
"əxlagsuzluğmaba" əyitə əməlbə, ama "be-
smaba" əyitəxun c'eri, taşi amdar bəsp'alt'in
k'anuna hələl nu əməlbəne baksa.

¹² Şot'o görəl k'anuna şameşit'oğoy nu
əməlbə divanbakalt'oğoy siyəyinə baksun tenan
çuresasa, yax çark'est'es bakala t'e k'anuna
tam əməlbənan.

¹³ İz işat'aynak' ük' nu bok'ala amdareynak'
Buxaçuğoy ük'əl divanbat'an tene bok'al. Ük'
bok'alt'aynak' isə divanbəkət'an q'ı tene bu!

*Vi vələğa vi biq'ala əşurxon ten ak'est'asa,
şot'ay sa xeyir tene bu*

¹⁴ Bez viçimux, əgər sunt'in "Buxaçuğoy vəzu"
pi, ama mot'o izi biq'ala əşurxon tene ak'est'asa,
mot'ay k'ə xeyirə bəkon? Çark'est'es bənekon
şot'o metər vələğən?

¹⁵ Uk'en ki, sa ği efi viçimoğoxun,
xunçimoğoxun sunt'in izi loxol lakala sa şey
nəəl iz jomo laxala sa k'ot'or şum tene bəğəbsa.

* **2:8 2:8** Lev. 19:18; Mat'. 22:39; Mrk'. 12:31; Gal. 5:14 † **2:11**
2:11 C'ey. 20:14; K'an. 5:8 ‡ **2:11 2:11** C'ey. 20:13; K'an. 5:17

16 Metər ğine efi şot'o ams'i-ams'i "barta xeyir-bərəkət vaxunq'an baki, taki gameki, uka-üğə" upsunen şot'o sa xeyir tanedon?

17 "Vəzu" pi, ama mot'o izi biq'ala əşurxon nu ak'est'ala amdaral haketərə. Ams'i əyitəxun q'erəz hik'k'al tene şot'ost'a bakala vəluğ.

18 Banekon şinesa metərəl uk'ane: "Hun vi vəluğa əyitenen ak'est'a, zu isə bezi biq'ala əşurxon". İsə eki hun vi vəluğa hik'k'al binut, zu isə bezi vəluğa biq'ala əşurxon ak'est'az.

19 Tək sa Buxaçuxe bu Ş - mot'oval vənu. Lap şaat'! Ama murdar urufxonal mot'o avat'un, şot'o görəne içoğo q'ıyen haq'sa.

20 İsə ak'est'az va, ay haq'ılsuz, vast'a bakala vəluğa biq'ala əşurxon ten ak'est'asa, şot'ay hik'k'ala dərmen nu baksuna?

21 Het'u görəne beşi bitot'ay bava Avraham izi ğar İsaak'a q'urban eşt'un çureğat'an Buxaçuğoy piyes şaat' ak'eşi? İz ğara iz kiin eçeri q'urbanluğ bsuna görə! *

22 İzi vəluğene şot'o me əşlə biq'est'i, izi biq'i əşlenal şot'ay vəluği hetər noxsansuz sa vəluğ baksunane ak'est'i.

23 İvel Şame boş bakala "Avraham Buxaçuğ vənəbaki, me vəluğenal şot'o Buxaçuğoy piyes düzgüne ak'est'i" † əyit Avrami biq'i me əşləxun oşane tam bex p'ap'i. Buxaçuğoy dost'e baki Avraham. ‡

Ş 2:19 2:19 K'an. 6:4 * 2:21 2:21 Burq. 22; Əbr. 11:17-19

† 2:23 2:23 Burq. 15:6 ‡ 2:23 2:23 2 Hadis. 20:7; İsa. 41:8

²⁴ İsə ananksa ki, Buxaçuğoy piyes düzgün ak'eseynak' saycə vëbaksun bəs tene baksə, efi vë sa amdar baksuna efi biq'ala əşurxonal ak'est'ine buq'on.

²⁵ Lap tarak'ala Raxavq'an baki. Şo teney ki, iz biq'i əslə görə Buxaçuğoy piyes düzgün ak'əsiyo? Oçala piyexun c'ovakest'eynak' harit'oğə iz k'oya q'onağbi, oşal içəğoy bač'anexun baft'it'oğə azdırışı, me amdarxo isə çark'est'unene şot'o Buxaçuğoy piyes düzgün ak'est'i. §

²⁶ Metərluğen, hetər ki, nəfəs nu haq'it'uxun oşa bədən hik'k'al tene, vëluğal haketər: şot'o vi biq'ala əşurxon ten ak'est'asa, şo hik'k'al tene.

3

Əyitmoğon bes bakalt'oğoy barada

¹ Bez viçimux, Buxaçuğoy laxi yaq'en taysuna zombala məəlim baksuna geleyal çurmayekinan. Divanbakala ğine ən gele şot'oğoy biq'i əşurxo bəğəğale.

² Günaxsuzo butene beş boş, Buxaçuğoy laxi k'anunxoy gelet'uxunyan c'eyşa yan. İz jomoy q'onçux baki günax nu əşp'est'ala amdar ap'i amdare. Metərt'in izi dirist' bədənəl günaxaxun efes baneksa.

³ Hetər ki əke jomo cilova badit'uxun oşa, əka içüval kiyel badi efes bakala k'inək'.

⁴ Gəmiğə bəğen: ost'aar muşene galst'a t'e kala gəmiğə iz ganuxun, ama p'urumal gəminə

c'idalt'ay kiyel bakala mis'ik' sa role şot'o idarabi t'ağay-mağay fırdalo.

⁵ Muzal haketər: iç mis'ik' baksuna ma bəğa, izi biq'ala əşur gele kalane. Sa mis'ik' çəren dirist' c'ələyə bok'osp'i şik'ala k'inək'!

⁶ Hat'e çər k'inək'e amdari jomo bakala muz. Muzna bele gireşe düzgün nu bakala, beşi bədənə dirist' murdarlayınşes bakala k'ə bunesa bito. Şone cəhənnəməxun arux haq'i beş yəşəyinşal dirist' bok'osp'i şipes bakalo.

⁷ T'etər sa tarak'ala nəəl xoreğala heyvan, purk'ala q'uş nəəl xene oq'a bakala çəli tene bu ki, insanen nu biq'i bakane nəəl biq'es nu bakane!

⁸ Saycə muze ki, hələ sa amdaren biq'i efes tene bake. Şo izi bəşinəmə nu haq'es bakala sa pisluge, bəsp'es bakala zəhəren buy sa pislug'!

⁹ Beşi Bava bakala Q'onçuğə alxışp'aloval muze, Bavan İçu oşq'ar yaratmışi insanxo q'arğışp'aloval. *

¹⁰ Hat'e sa jomoxun alxışal c'enesa, q'arğışal. Ay bez viçimux, ma banan metər!

¹¹ Ef zənden sa orayinaxun ham şaat', hamal pis xe c'enəğon?

¹² Bez viçimux, incilnə xoden zeytun nəəl ki c'ap'en incil c'epsuna ak'enan? Elaxoy orayinaxun uğələ xe c'eyşunal haketər!

Həgigi müdriklug'

¹³ Şuva ef boş t'e içü müdrik, əxilak'al hesabalo? Barta mot'o izi hetər yəşəyinşbsunenq'an

* 3:9 3:9 Burq. 1:26

ak'est'i. Barta izi müdrik baksuna izi bit'oğö çoyel nu duğsunenq'an ak'est'i.

¹⁴ Ama təə, əgər paxılluğaxun ef piin şuk'k'ala tene aksasa, şuk'k'ali saat'a tenan çuresasa - mo müdriklüğ tene! Havayi pul mağaçp'anan.

¹⁵ Metər "müdriklüğ" amdara alaxun tadeğala müdriklüğ tene. Buxaçuğoxun əxil, me dünyənexun bakala, şeytanaxun eğala müdriklüğe mo!

¹⁶ Axırı əgər paxılluğaxun ef piin şuk'k'ala tene aksasa, əgər vəxun başq'a şuk'k'ala tenan çuresasa, saycə gərgürçilüğ saki pis əşur biq'sune bakon ef əş.

¹⁷ Alaxun tadeğala müdriklüğ isə noxsansuz müdriklüğe. Şot'ay əş serlüğ yaratmışbsun, amdarxoy ük'el baksun, yaq'ax taysun q'a t'iyəmint'aynak' ük' bok'ospune bakon. Metər müdriklüğən saat' əşure biq'est'on. Amdar c'ək'psuna q'a p'əçolaluğa iz biin nu haq'ala müdriklüğe mo.

¹⁸ Me serluğa yaratmışalt'oğoy exp'aloval içoğoy bit'it'uxun c'eri düzgünlüğe bakon.

4

Vəx Buxaçuğoy bəş oq'a biq'anan

¹ Het'uxune me efi sunaxun nu yaq'ax taşi düşməncilüğbsun? Ef boş jalk'ala tamaxxoxune morox bito!

² Efi çureğalt'oğoy vəst'a nu baksunene vəx t'iyəmint'u nifrətp'est'a. Metərлуğən şot'o bəsp'ınan baksa vən. Efi paxılluğbalt'u efi kul nu p'ap'at'an, burnanqsa davabi düşməncilüğbsa.

Efi nu baksun isə, efi çureğalt'oğə Buxaçuğoxun nu afırıpi çuresaxune.

³ Lap afırıpi çuralğaynan hatenanq'sa, şot'o görə ki, saat' şeyeynak' tenan çuresa. Efi tamaxa bəspseyinak'nan çuresa!

⁴ Ay Buxaçuğoy laxi yaq'axun c'eriyorox, q'amışakanan! Vəynak' me dünyəne dəyərlü bakalorox muç'anesa, Buxaçuğoxun əxilnan upsune! Me dünyənə efi piin işiğ bsunen Buxaçuğoy piyexunnan biti baksa.

⁵ İvel Şamen uk'alt'oğə eyex badanan: "Buxaçuğon yax tadi İvel Urufi çuresun t'etərə ki, * İçuxun q'erəz şunesa nəəl het'unesa bul k'osbsuna biin extenest'a Şot'ay". Ef zənden me əyitmux hat'etərə şameşe?

⁶ Ama p'urumal, Buxaçuğost'a bakala xeyirx-axluğ gelene, q'imiştenebsa yax Şot'in. Axırı İvel Şamenal nexə mot'o:

"Buxaçuğon lağlağibalt'oğoy loxol İçine axşumk'on,
Fağır amdarxo isə İz ük' bok'ospsunane ak'est'on". †

⁷ Şot'o görəl Buxaçuğoy əyiten takinan! Şeytana vəx İša bist'a ma bartanan, t'e vədə şo iç vəxun t'it'ale.

⁸ Buxaçuğə İša bakanan, Şoval vəxq'an İša baki. Günax əşp'est'unaxun kul haq'anən, ay günaxkərxo! Təmizbanan ef ük'ə, ay qı ük'en vəbakalxo!

* 4:5 4:5 Nəəl: *Buxaçuğon İz İvel Urufa tadit'u tetərə çuresa ki*

† 4:6 4:6 Məs. 3:34

9 Yas efanan, önepi şivan banan! Barta efi axşum öne, müqluğal fırıpi yasq'an baki.

10 Vəx Buxaçuğoy bəş oq'a biq'anan. Bartanan Şo vəynak' hər şeyaxun üst'ünq'an baki, Şot'inal vəx əcəvk'ale. ‡

11 Ay bezi viçimux, sunay pisa ma əyitp'anan! İz İşat'ay pisa əyitp'i q'inəyinşalt'in Buxaçuğoy laxi k'anuna hik'k'albsunen t'e k'anunane pisləyinşi baksa. K'anuna pisləyinşi şot'ost'a noxsan qəvesun isə şo upsune ki, hun k'anuna əməlbalo təə, t'e k'anuna divanbalonu.

12 Ama k'anuna laxiyoval, t'e k'anunen divanbaloval Soğone! Saycə Şot'ine nə çark'est'es, nəəl q'ərar c'evk'i besp'es bakon. Hun şunu ki, vi İşat'un divanbsa?

Hər şey Buxaçuğoy kiyele

13 İbakanan k'əz nex, ay "filan şəhərə tağoz, taşi t'iya sa usen yəşəyinşi alverbi təngə q'azayınşoz" uk'alxo!

14 Vən sal avatenan ef bel əyc'ə k'ə eğale! Yəşəyinş hik'ə ki? C'ovaki tağala sa küün k'inək'nan - ğe bunan, əyc'ə təə!

15 Əyitə uk'at'an metər upanan: "Buxaçuğon bark'ayin, beş elmoğon nu laft'ayin, me-me əşurxo balyan".

16 P'oy efi balo hik'ə? Vəxun t'ema irəzinan ki, hələ sa forsp'i mot'o piyelal bananst'a. Metər biyal pis əş biq'inan baksa!

‡ 4:10 4:10 İov. 5:11; Mat'. 23:12; Luk'. 14:11; 18:14; 1 P'y. 5:6

¹⁷ Mətərluğen, şaat' əşlin manu baksuna av-abaksun taşi pis əş biq'alt'in günax əşpest'ine baksə.

5

Ef ğina önepanan, ay dövlətluyorox!

¹ İsə ibakanan vəx k'əz nex, ay dövlətluyorox! Önepi şivanbanan, şot'o görə ki, bəlooxe eysa vəynak'. *

² Mone, puçbaki taneşi efi girbiyorox bito, efi paltaral ene miğmığen k'as'p'ene, †

³ efi girbi q'ızıl-gümüşenal ene pars biq'ene. Me dünyəni axıreynak' mal mandi sa vədinenan girbi vən t'e təngöğö! Şot'oğoy loxol bakala parsenal efi taxsırkər baksuna ak'est'ale divan-bakala ğine, vəx aruğö badi bok'osp'ale.

⁴ Ef oçalxo exp'alxoy tənginənan bot'i vən, muz qaypi şikəətt'unbsa t'e təngöğön, taşi p'anep'i Göye Q'oşuni Q'onçuğoy ümöğö t'e exp'alxoy şivan.

⁵ Kəyi-üği tarananpi vən me dünyəne, ama axırda şameseynak' bakala sa heyvana ukest'i kökbsun k'inək'e mo!

⁶ Ef bəş aciz bakala taxsırsuz amdarxonan taxsırkər c'evk'i bəsp'est'i vən.

Axıral şirik' port'p'alt'u tadeğale

⁷ İsə bez uk'alo şone ki, portp'anan, ay viçimux! Q'onçuğön me dünyəne hari pist'oğoy cazina tadala ğinal şirik' portp'anan, bit'it'in hər joğulin q'a payizin ağaloğoy yaq'a bəği iz

* 5:1 5:1 Luk'. 6:24 † 5:2 5:2 Mat'. 6:19

bit'it'uxun muč'a bar çukala ği eġamin portp'ala k'inək'.

⁸ Portp'anan, ef umuda ma bot'anan, şot'o görə ki, Q'onçuğoy eġala ğineynak' male mande.

⁹ Sunaxun şikəətmabanan, ay viçimux, mot'ay cazina zap'k'alnan! Mone, çomoy jomost'ane Divanbal!

¹⁰ Bezi viçimux, çətinluğxo portpsuni k'ə bak-suna aksun çurnansasa, Q'onçuğoy pit'oğo yax p'ap'esp'i xavareçalxo bəğanan.

¹¹ Axıral şirik' portp'i çətinluğaxun c'eġalt'uyan bəxt'əvər nex yan. İova bəğanan, hər şeyə portp'i, axırda Q'onçuğoy xeyir-bərəkətəne haq'i şot'in, şot'o görə ki, ük' bok'osp'al q'a xeyirxax bakalone Q'onçux. ‡

Elaspsunaxun əxil bakanan

¹² Samci, bez viçimux, hik'k'ala ef muzel eçeri elasmapanan. Nə göyə, nə oçala nəəl q'erəz sa şeyə, şot'o görə ki, metər bi Buxaçuğoy piyes günaxnan əsp'est'i baksa. § Barta ef əyitəst'a "hoo" əyit hooq'an baki, "təə" əyit təəq'an baki.

Afırıpsunen bes bakalorox

¹³ Ef boş t'arnu baft'iyo bunesa, barta t'e amdaren Buxaçuğq'an afırıpi xoyinşp'i, şunesa mügesa, barta Buxaçuğ şükürbala məğurq'an məğpi.

¹⁴ Azari bakalo bunesa, barta Q'onçuğ Çark'est'al k'inək' q'abulbit'oğoy loxol ağsaq'q'alluğbalt'oğq'an k'alpi, şot'oğonal

‡ **5:11 5:11** Dan. 12:12; İov. 1:21-22; 2:10; 42:10-17; İvel məğ. 102:8 § **5:12 5:12** Mat'. 5:34-37

hari c'əyin ləəmdi * afırıpsunen şot'aynak' Q'onçuğoxun q'olaybaksunq'at'un çureşi.

¹⁵ Şot'o görə ki, ük'en vëbaki bala afırinen q'olayebşa. Q'onçuğonal şot'o turelbale. Əsp'est'i günax but'uxsa, şot'oğoval bağışlayınşale. †

¹⁶ Ef əsp'est'i günaxxo ef ozane haq'anan, sunaynak' exlətp'i sunaynak' afırıpanan ki, Q'ONÇUĞONAL ef elmoğə ost'aarq'anbi. Şot'aynak' ki, düzgün bakalt'ay ük'en afırıpsunen gele şeyə bes bakan.

¹⁷ Xavareçal İlya ext'en, şoval yallarik' sa amdarey. Ama şot'ay ük'en afırıpi ağala nu eysuna çuresunen, oçali loxol xibinqi usen ağala tene hari. ‡

¹⁸ Oşa p'urumal, şot'ay afırıpi ağala çuresunene ağalina eçeri, oçalenal t'e ağalınaxun oşa p'urum bar tast'ane burqi. §

Axırıncı nəsyət

¹⁹ Bez viçimux, əgər ef boş't'an sunt'in düz yaq'axun c'erit'u qaydi düz yaq'a eçayin,

²⁰ avabakeq'an ki, metərt'u bisunaxun çark'est'i həmişəluğ yəşəyinşə q'azayinşest'i baksa, şot'ay əsp'est'i günaxxoy gelet'ay loxolxun but'k'ine baksa. *

* **5:14 5:14** - T'e vaxt'in döörəst'a amdari bel c'əyin ləəmt'suni sa hema mənəne buy. Mot'oğoxun soğə şəney ki, "ləəməşiyo" "İvel Urufen c'ək'p'iyo" upsuney, yəni metər bsunen ağsaq'q'alxon azarineynak' İvel Urufen İz c'ək'p'it'u tades bakala q'olaybaksunat'un afırıpi çuresay. † **5:15 5:15**

Mrk'. 5:15 ‡ **5:17 5:17** 1 Padç. 17:1 § **5:18 5:18** 1 Padç.

18:1,41-45 * **5:20 5:20** Məs. 10:12; 1 P'y. 4:8

Udi Bible

Udi Scripture translation

copyright © 2020 Translation Services International Ltd. and Wycliffe Bible Translators, Inc.

Language: (Udi)

Contributor: Wycliffe Bible Translators, Inc.

All rights reserved.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

174556f0-71b4-5f1c-b512-2117b07ebbf0